

APPELLATIO SECUNDA.

Der Durchleuchtigen/
Hochgebornen Fürsten vnd Herrn/ Herrn
Ernstten Marggraffen zu Brandenburg/ in Preussen/
zu Stettin/ in Pommern/ der Cassuben vnnnd Wenden/ Auch in
Schlesien/ zu Crossen vnd Jägerndorff/ Herzogen/ Burggraffen
zu Nürnberg/ vnd Fürsten zu Rügen/ &c. Vnd Herrn Wolff-
gang Wilhelmen Pfaltzgraffen bey Rhein/ Herzogen
in Bayern/ Graffen zu Veldenz vnd
Spanheim/ &c. Als dritter.

An stat vnd von wegen dero/ in den Sältschen Für-
stenthumben vnd zugehörigen Provinzien/ Landstände/ Räte/
Beambten/ Dienern/ Vnderthanen/ Schutz-
verwandten vnd geworbenen Kriegs-
Leuten/ &c.

In puncto retinendæ Possessionis.



In Gottes Namen Amen/ Kund vnd zu wissen sey alle
 vnd jeden denen diß offen instrumentum zu sehen/ zu lesen/ vnd
 zu hören lesen vorkombt/ Das im Jahr nach Christi vnser lie-
 ben Herrn Geburt 1609. in der achter Indiction Römer zins-
 zal genant/ bey Herzschnung vñ Regierung des Allerdurchleuch-
 tigsten Großmechtigsten vnd Unüberwindlichsten Fürsten vnd Herrn/ Herrn
 Rudolffen des andern von Gottes Gnaden erwöhlten Römischen Kayfers zu
 allen zeiten mehrer des Reichs in Germanien/ zu Hungaren/ Böhem/ Dal-
 matten/ Croatten vnd Schlawonien/ 2c. Königs/ Erzhertzen zu Osterreich/
 Hertzen zu Burgundt/ Steyr/ Kärndten/ Krain vnd Wirtenberg/ Graffen
 zu Tyrol/ 2c. vnser Allergnedigsten Herrn/ Ihrer Kay. May. Reiche des Röm-
 ischen vnd Böhemischen im 35. vnd des Hungarischen im 38. Jahren/ auff
 Montag den 28. Decembris stylo novo, vormittag vngesehr vmb neun
 vñren/ wir vnden benente Notarien vnd zeugen allhie zu Düsseldorf gen Hoff
 gefordert/ vnd daselbsten auff dem Fürstlichen Schloß in der gewöhnlichen
 Kuchstuben beyfammen an einer Taffel sitzen befunden/ Den Durchleuchti-
 gen/ Hochgebornen Fürsten vñnd Herrn/ Herrn Ersten Marggraffen zu
 Brandenburg/ in Preussen/ zu Stettin/ Pommern/ der Cassuben vnd Wen-
 den/ auch in Schlessen/ zu Croffen vnd Jegerndorff/ 2c. Herzog/ Burggraffe
 zu Nürenberg vnd Fürst zu Rügen/ neben Ihrer F. Gn. zugeordneten/ vnd
 Rächten/ Vnd dann des auch Durchleuchtigen/ Hochgebornen Fürsten vnd
 Herrn/ Herrn Wolffaang Wilhelm Pfalsgraffen bey Rhein/ Hertzen in
 Bayern/ Graffen zu Beldeng vnd Spanheim/ 2c. hinderlassene Rächte/ Vnd
 hat der Hochgelehrte Doctor Erasmus Moriz zu vns zu reden angefangen/
 Hochgedachter Ihre F. Gn. so daß auch die hinderlassene Pfals Newburgische
 Herrn Rächte/ nehmen vnser vnd der Notarien vnd zeugen auffersfordern be-
 schenes gehorsames erscheinen/ zu gnedigem vnd günstigem gefallen auff/
 vnd were demnach an deme/ das kurz verschienener zeit abereins zu Deuren erli-
 che vnderm Namen der Röm. Kay. May. emanirte Mandata vnd Process an-
 geschlagen vnd publicirt werden wollen (die jedoch daselbsten nicht angenom-
 men weren/ vnd davon Hochgedachter Herr/ Pfalsgraff gestern allererst rechten
 bericht anhero gelangen lassen) vnd das hernacher dieselben in des Heyligen
 Reichs Statt Eöln den 19. Decembris auch newen Calenders/ davon doch
 allererst vor wenig tagen avisé einkommen/ durch einen Herolt vermittelt ge-
 wöhnlicher Ceremonien offentlich exequirt weren/ darin Ihre FF. GG. dero
 Beambten/ Dienern/ Vnderthanen/ Schutzverwandten vnd Kriegsvolck
 mercklich

mercklich gravirt, vnd das sie allerseits noch weiter dahero gravirt werden möch-
 ten/ zubefahren stände/ Darumb Ihre FF. GG. vnd wolgedachte Rähre/ zu
 rettung ihrer vnd der ihrigen vnschuld keinen vmbgang haben mögen/ die mit-
 tel dagegen an die hand zunehmen/ so in solchen fällen die heilsamē Rechte ver-
 gönnen vnd zulieffen/ Vnd hetten demnach ihre notturfft auff's Papyr bringert
 lassen/ vnd dieselbe vns fürzulesen gnedig befohlen. Darauff wolgedachter D.
 Erasmus Moriz den Appellation zettel von wort zu wort verlesen/ vnd nach
 verlesung zu reden continuirt/ Ihre F. G. so wol die hinderlassene Pfalz Rer-
 burgische Herrn Rähre/ requirirren vns Notarien vnd zeugen fleissig/ fleissiger
 vnd auff das aller fleissigst/ das wir diese respectivē Supplication vnd Appel-
 lation wol ad notam nemen/ ein instrumentum darüber begreiffen/ dasselbe auff
 Pergament ingrossiren/ vnd vmb die gebür/ darauff vns arra an Gold vnd Sil-
 ber zugestellt/ eines oder mehr darüber heraussert geben/ vnd sonst mit insinuit-
 rung vnd dem vbrigen thun wolten was vnser officium were/ vnd sich zu preffi-
 ren gebürte/ zu welchem ende vñ so viel diesen Actum belanget/ wir vnserer eide/
 damit Hochgedachten Ihren FF. GG. wir vnderthenigst verwandt/ gnedig
 erlassen sein solten.

Nun volget vnd lautet der zettel von wort zu wort also.

Die Durchleuchtige/ Hochgeborne Fürsten vnd Herrn/ Herz
 Ernst Marggraff zu Brandenburg/ in Preussen/ 2c. Herzog/ 2c. Vnd
 Herz Wolfgang Wilhelm Pfalzgraff bey Rhein/ in Bayern/ 2c.
 Herzog/ 2c. in habender vollmacht der Durchleuchtigsten/ Durchleuchtigen
 Hochgebornen Fürsten vnd Herrn/ Herrn Johan Sigismunden/ Marggraf-
 fen zu Brandenburg/ des Heiligen Römischen Reichs Erz Cammerern vnd
 Churfürsten/ 2c. Vnd Frauen Anna Pfalzgräffin bey Rhein/ in Bayern/
 Herzogin/ 2c. Ihrer FF. GG. geliebter respectivē Herrn Bruder vnd Frau
 Mutter/ thun in gegenwart ewerer der Notarien vnd erforderen zeugen vol-
 genden bericht.

Demnach die Allgemeinen Rechte heilsamlich verordnen vnd zugeben/
 daß ein jedweder wegen zugezogener vñ empfangener beschwernussen/ Bericht-
 lichen oder aussert Gerichtlichen/ gegenwertigen oder künfftigen/ wie die Na-
 men haben mögen/ nicht allein vor sich Principaliter, sondern auch als ein Ter-
 tius seines mit einlassenden interesse halb/ zuvorab eine Obrigkeit vnd Herr-
 schafft wegen dero Vnderthanen vnd zubehörigen vor ihm jeden Richter
 3 mediato

mediato sive immediato, ordinario sive delegato, ad superiorem sive committentem, quinimo ab eodem ad eundem, sich beruffen/ appelliren oder suppliciren möge/ Vnd dann kurz verflittener zeit abereins esliche Process vnd Eventual Achts erklärungen/ so zu Prag den 6. Novembris dieses aufgehenden Sechzehnhundert vnd Neundren Jahrs datiert/ wider die geworbene Kriegsteute/ Beampte, Rähte/ Diener/ Stände/ Vnderthanen vnd Schutzverwandten der Fürstenthumben Gütlich/ Eleve vnd Berg/ vnd dero zugehöriger Graff vnd Herrschafften vnderm Namen der Römischen Kayserlichen Mayestät/ auß sonderem befehl Erzhersog Leopoldi/ Bischoffen zu Straßburg vnd Passaw/ 2c. als angegebene Kayserlichen vornembsten Commissarij erstmahls zu Deuren/ daselbst sie doch nicht angenommen/ hernacher den 19. Decembris neuen Calenders selbigen Jahrs in der Heyligen Reichs Statt Eölln (davon allereft diese nechst verschienen tage genugsamer berichte einkommen) durch einen Herolden exequiren, vnd öffentlich an verschiedenen ohrten angeschlagen worden/ Deren eins also lautet:

Wir Rudolff der ander von Gottes Gnaden Erwählter Römischer Kayser/ zu allen zeiten mehrer des Reichs in Germanien/ zu Hungaren/ Böhem/ Dalmatien/ Croatten vnd Slavonien/ König/ 2c. Erzhersog zu Osterreich/ Herzogen zu Burgund/ Steyr/ Kärnten/ Krain vnd Wirtemberg Graffe zu Tyrol 2c. Entbieten allen vñ jeden Kriegesobersten/ Rittmeistern/ oder ihren Leutenanten/ Hauptleuten/ Fendrich/ Befehls vnd gemeintlich allen Kriegsteuten zu Ross vnd Fuß/ wie die Namen haben/ auch was Nation/ Stands oder Würden die seyen/ so in Gütlichen/ Elevischen vnd Bergischen Fürstenthumb/ auch andern dazu gehörigen Graff/ Herrschafften vnd Länden bestelt/ außgeführt vnd erworben/ oder noch in werbung oder anzug stehen vnd darunder ersucht vnd gebraucht werden möchren/ vnd ins gemein allen denen/ welchen gegenwertig vnser Kayserlicher Brieff/ auff anordnung insonderheit darzu deputirten Kayserlichen Commissarien/ oder anderen von ihnen hierzu verordneten Personen fürkompt/ inkuirt vnd verkundet würd/ hiemit zu wissen. Ob wol wir euch sampt vñ einem jeden insonderheit vnder dato des Eilfften Julij nechsthin durch offne Mandata vnd Patenten von Römischer Kayserlicher macht vnd vollkommener gewalt/ den jenigen zwar so vnser vnd des Reichs Vnderthanen oder verpflichte nicht/ vnd etwo außwendigen frembden Nationen/ Herrschafften vnd

Obern

Obem zugethan vnd verwandt sein möchten bey Leib straff/ wo sie betretten
 würden/ den andern Vnsern vnd des Reichs vnmittelbaren Vnderthanen/
 Pflichtsverwandten/ Vasallen vnd Lehensleuten aber/ oder welche vnder vns
 vnd dem Heyligen Reich geseffen vnd begüet/ bey peen vnd straff Vnsere vnd
 des Heyligen Reichs Acht vnd aber Acht / darzu verlust aller vnd jeder ihrer
 Haab vnd Güter/ welcher enden vnd ohrten die im Heyligen Reich/ oder den
 selben verwandten Ständen gelegen seyen/ auch aller Lehen/ Gnaden/ Privi-
 legien/ Freyheiten/ darinn die Vberrreter ipso facto ohne einige fernere erklä-
 rung gefallen sein sollen/ avocirt, vnd ernstlich befohlen vnd gebotten/ das ihr
 in angeregte Gütliche Fürstenthumben vnd darzu gehöriger Land: Graff-
 schafften/ Embter/ Stätt/ Schlöffer/ Gerichte/ Pflügen/ Dorffschafften/ Ge-
 bieten/ Landschafften/ Vnderthanen vnd Verwandten/nicht allein als gleich/
 vnd so bald euch sampt vnd sonderlich solch vnser Mandat vnd dessen glaub-
 würdige von vnsern Kayserlichen Commissarien vidimirte Abschriften ver-
 kündet vnd zu wissen gemacht würden/ ohn allen auffhalt wider einräumen vnd
 genzlich verlassen/ mit allen gewaltharen verschonen/ vnd in keine weis feind-
 lich angreifen/ beleidigen vnd beschweren/ auch euch fürters hin/ wie vnd mit
 was schein es von den Kriegsherrn vnd Obersten mehr begeret oder fürge-
 nommen würde/ im wenigsten nicht darwider vnd gegen vnserer der Präten-
 dierenden Interessenten halben erkendte/ verkündte vnd aufgeschlagene offne
 Mandata einen oder andern zu präiuditz vnd versang bestellen vnd gebrau-
 chen lassen/ sondern wo sich vielleicht einer oder mehr derselben ohre ichtwas
 vnderstanden/ dasselbige widerumb abstellen/ vnd ohnejemandis beleidigung
 neben gebürlicher bezahlung aller zerrung zertrennen vnd vnfaumtig abziehen/
 vnd deme nicht anders thun oder vngheorsam sein sollet/ So lieb euch vnd
 ewer jeden insonderheit were vorgemelte peen vnd straff zu vermeiden/ solche
 vnser Mandata vnd ernstliche gebott/ auch hernacher allenthalben in Stä-
 ten/ Schlöffern/ Dörffern in mehrbesagten Fürstenthumben vnd Landen/
 durch vnsern Herolden vnd andere Executores der gebür mit gewonlicher So-
 lenniteten verkünd vnd offentlich angeschlagen worden/ auff das sich niemand
 der vnwissenheit zuentschuldigen hat/ Vnd sich gebürt hette/ das ihr darauff
 solchen ihren Kayf. avocatorijs vnd Mandatis alles ihres inhalts gehorsamlich
 gelebt/ vnd euch lenger dem zuwider in besagten Fürstenthumb vñ Landen/in et-
 nes oder des andern Interessenten dienst/ zu nachtheil vnd vnwiderbringlichen
 schaden vnd versang der andern/ auch ringerung vñ veracht vnserer Kay. May.

Auctoritet vnd hierin gebrauchten Kayserlichen Richterlichen Ampts nicht
 auffgehalten/ bestellen oder gebrauchen/ weniger den Vnderthanen mit einle-
 gerung vnd abägung ihres vorraths vnd notdurfft vber den hals gelegen/ vnd
 beschwer vnd bedrangnis zugefügt haben sollet. So ist vns doch nicht allein
 von vnsern dahin verordneten Commissarien/ sondern auch andern ansehn-
 lichen Ständen des Reichs beglaubter bericht fürkommen/ das ihr dem zu-
 mahl gegen solchen Mandatis freuentlich in viel weg zuwider gehandelt/ vnd
 nicht allein die Land/ Stätt vnd Dörffer nicht geraumet/ noch auß der bestal-
 lung vnd dienst begeben/ sondern hierüber noch zu behuff beyder des end an-
 wesenden Der Hochgebornen Ersten Marggraffen zu Brandenburg/ zu
 Stettin/ Pommern/ der Cassuben vnd Wenden/ Herzogen/ Burggraffen zu
 Nürnberg vnd Fürsten zu Rügen/ze. Vnd Wolffgang Wilhelm Pfalzgraf-
 fen bey Rhein/ Herzogen in Bayern/ Graffen zu Beldens vnd Spanheim/ze.
 vnserer lieben Oheim vnd Fürsten/ bis auff diese stund verblieben/ vnd euch in
 deren eyd vnd dienst weiter begeben/ mustern vnd bestellen lassen/ Schlöffer vnd
 Stätt in ewere verwehr vnd besagung genommen/ auch andere thätlich ein-
 nehmen heissen/ Vorberürten Fürsten in ihren vnrechtmessigen beginnen vnd
 verbotten/ artentiren, allen vorschub geleistet/ auch wol den Vnderthanen an
 vielen ohren ferner beschwer auffgedrungen/ vnd keine zehrung bezalt haben
 sollet/ alles zu grossen schaden vnd nachtheit vnser vnd des Heyligen Reichs/
 auch andern Interessenten/ ja auch zu der vermessheit gerahen/ das ihr vn-
 sere selbst eigene Güter/ die wir zu Edln einkauffen/ vnd durch Verchem zu
 vnserer freundlichen geliebten Vereern/ Sohn vnd Fürsten/ als desz oris hoch-
 ansehnlichen fürnehmsten Commissari S. Erzhernog Leopoldi E. notwendi-
 gen Leibs Guaridi vnd verwahrung der Bestung Gütlich dahin führen lassen/
 wider alle Reichs Constitutionen ohne einliche befügung daselbst zu Verchem
 angehalten vnd behemmen dörfen/ darüber in viel andere weg dem Mandato
 aufffentlich zuwider gehandelt/ Wie wol wir nu wol befugt/ wegen solcher mut-
 williger vorfeglicher contravention vnd vngheorsam/ auch andern dabey ver-
 üben groben vbertretungen gestracks ohne weiter procediren oder anders euch
 sampt vnd besonder/ in die den Mandatis einverleibte/ vnser vnd desz Heyligen
 Reichs Achr vnd aber Achr/ auch andere straffen zuerklären/ vnd dieselbe ohn
 auffenthalt wider euch zu exequiren. Gleichwol damit sich niemand zu einlger
 verkürzung oder vberreitens mit fügen zubeschweren/ vnd alle vnd jede Vber-
 tretter vnd Vngheorsamen desto mehr ihres mitwilligen verbrechen vnd wol
 verdienter straff vberzeugt werden/ vnd zumahl kein entschuldigung vorwen-
 den mög.

den möge/ so haben wir euch sampt vnd sonder nochmaln mit diesem vnserm
 Kayserlichen Mandat ermahnen/ vnd eine benante zeit/ euch von dem vnge-
 horsam zu purgiren/ auß lautern Kayserlichen gnaden vnd zum vberfluß aller-
 gnedigst ansetzen wollen. Befehlen euch demnach allen vnd einem jeden inson-
 derheit/ auß Kayserlicher macht vnd vollkomner gewalt abermahl bey obbe-
 rürtem vorigen vnserm Mandato einverleibte straffen/ auch verliering ewer
 Ehren/ Digniteten vnd Würden/ Vnd das ihr auff den vnverhofften fall des
 vngehorsams vnd widersertigkeit allenthalben im ganzen Römischen Reich
 Ehrlos/ gefreuet/ gescholten vnd gehalten/ Darneben ewere Leib vnd Güter
 i-dermenniglichen frey gelassen sein sollen/ Ernstlich vnd vestiglich gebierend
 vnd wollen/ das ihr innerhalb sechs wochen den nechsten von dato/ wann dieses
 vnser Kayserlich Mandat vnd Brieff euch verkündet oder zuwissen gemacht/
 anzureiten/ den wir euch vor den ersten/ andern vnd letzten/ vnd also perempto-
 rische Termin ansetzen/ vorberürt vnserm Mandato alles seines inhaltes gehor-
 samlich gelebt/ Die Landen/ Städte vnd Schloßer zumahl räumet/ ewere den
 beyden allbereit anwesenden Fürsten geleiste eyd vnd pflichten aufflöndet/ vnd
 ferner denselben wie auch andern präntendirenden Fürsten/ vor Rechtlicher
 vnserer entscheidung in keine Kriegsbeställung oder dienst gebrauchen lassen/
 in keinerley weiff/ diß vnd kein anders thut/ so lieb euch ist vorberürte straffen
 zu vermeiden. Wie wir auch euch hiemit aller eyd vnd pflichten vnd anderer
 glauben/ damit ihr vielleicht beyden Fürsten verwandt sein möchtet/ auß Kay-
 serlicher vollkommenheit vnd macht/ absolviren/ erledigen vnd freyzeihen/
 Dergestalt das ihr dardurch keins wegs mehr verbunden oder befahret sein sol-
 let. Welche nun auff dieses vnser Kayserlich gebote sich wider zu vnserm ge-
 horsam ergeben/ den Mandatis der gebür volg leisten/ vnd von ihren vorgekom-
 men widersertigkeiten innerhalb vorgesezter zeit ablassen/ vnd derhalben bey
 vnserm hochansehnlichen fürnehmsten Commissario vnserer freundslichen ge-
 liebten Vettern/ Sohn vnd Fürsten/ Ershertzog Leopoldt I. sich angeben vnd
 erklären werden/ denselben wollen wir hiemit vnd krafft dieses Brieffs auß
 Kayserlichen Gnaden/ was sie durch vorige widersertigkeiten dagegen ver-
 bracht vnd verwürckt/ allerniedigst verziehen vnd nachgegeben haben/ Die
 andere aber so in ihrem vorgekommen vngehorsam vnd vorseztlichen bösen freu-
 lung beharren/ vnd innerhalb vorgesezter zeit nicht reffiscieren/ vnd als bald
 daselbst vor den Commissarien erklären werden/ dieselbe wollen wir entlich
 hiemit für erklärte Rechter/ jeso als dann/ vnd dann als jeso gehalten haben/
 Wie wir dieselbe auff solchen fall hiemit nochmaln jeso als dann/ vnd dann als

90

tego in vnser vnd des Heyligen Reichs Acht vnd aber Acht/ auch andere den
vorigen vnd jetzigen Mandatis einderleibre straffen/ gefallen zu sein erklären/
Dieselbe Ehrlos declariren, jedermenniglichen ihren Leib vnd Güter frey ge-
ben/ vnd wollen darauff dem Execution nach verlauff des angefügten Termins/
ohne einigen vnderscheid/ wider dieselbe sampt vnd sonders entlich ergeben/
befehlen vnd vollziehen/ vnd niemand wer der auch seye/ verschonen lassen/
Darnach habe ihr euch sampt vnd ein jeder insonderheit zu richten vnd zu hü-
ten/ Dann diß ist vnser entlicher will vnd befehl/ Geben auff vnserm Königs-
lichen Schlos zu Prag/ den sechsten tag des Monats Novembris Anno sechs-
zehen hundert vnd Neundren/ Vnserer Reiche des Römischen im fünff vnd
dreißigsten/ des Hungarischen im acht vnd dreißigsten/ vnd des Böhmeischen
auch im fünff vnd dreißigsten.

Rudolff.

L. von Stralendorff.

Ad mandatum Sacre Cæsareæ
Maiestatis proprium.

God: Hertch

Das ander aber dieses inhalts ist.

Wir Rudolff der ander von Gottes Gnaden Erwählter Römischer
Kaysler/ zu allen zeiten mehrer des Reichs in Germanien/ zu Hun-
garn/ Böhme/ Dalmatien/ Croatien vnd Slavonien/ König/ zc.
Erzherzog zu Osterreich/ Herzog zu Burgund/ Steyr/ Kärndten/ Craint
vnd Wirtemberg/ Graf zu Tyrol/ zc. Embieten allen vnd jeden Weyland
Herzog Johann Wilhelms zu Gältich/ zc. vnser in Gott ruhenden Vetteren
vnd Fürsten/ Christmildesten angedenckens hinterlassenen Rächten/ Va-
ampren/ Dienern/ vnd ins gemein allen vnd jeden in Gältischen/ Elew-
schen vnd Bergischen Fürstenthumben/ auch darzu gehörigen Graff/ Herr-
schaften vnd Landen/ maessenen Ständen/ Vnderthanen vnd Schutzw-
wanden/ wes Stands Würden oder Wesens die sein/ vnser Gnad/ Vnd
fügen ihnen hiewit zu wissen. Demnach wir gleich auff absterben ermttes
Herzogen

Herzogen Johan Wilhelms zu Conservation/vnser vnd des Heiligen Reichs/ auch eines jeden Interessenten befugnuß/ Recht vnd Gerechtigkeit/ so wol erhalten gemeinen frieden vnd ruhe/ auch anwendung aller gefährlichen besorgter zerüttlichkeit dieser löblichen Fürstenthumb vnd darzu gehörigen Landen/ auß tragendem Kayserlichem Ampt vnd Väterlicher sorgfältigkeit/ auch vnder dato des zweiten Aprilis negsthin Allerquedigst befohlen/ die durch vns hiebevorn bestelte Regierung fernner in vnserm als Regierenden Römischen Kayfers vnd Obersten Vniversal/ auch Lehenherrn Namen/ bis zu anderer vnserer verordnung zu continuiren/ vnd bey namhafter peen keine newerung noch enderung zugestatten/ noch einigen Interessenten/ wer der auch were/ vor eweren Herrn vnd Obrigkeit ohne vnser erlaubnuß vnd bewilligung zuerkennen vnd anzunehmen/ sondern alles im alten stand/ darinn es nach Tödlichem abgang obgedachts vnseres Vetteren Herzog Johan Wilhelmen zu Süllich/ re. gewesen/ zulassen vnd zuhandhaben/ Darauff auch folgendes durch vnser in diese Lande Deputierte Commissarien den fünfften May solchen befelch vnd verbott erwidern/ zu erhaltung dessen gute verordnung verassen/ Daneben am vier vnd zwanzigsten May wider alle Interessenten ein Mandatum inhibitorium cum annexa Citatione ad proponendum actiones Edicts weise aufgehen/ Die Rächte/ Ritter vnd Stände vielfältig solches vnseres Befelchs vnd verordnungen erinnern/ vnd denselben schuldigen gehorsam vnd folg zuleisten/ anmahnen vnd verwarren. Hierüber beyde diß ohrts anwesende/ Als die Hochgeborne Ernst Marggraff zu Brandenburg/ zu Stettin/ Pommern/ der Cassuben vnd Wenden/ Herzog/ Burggraffe zu Nürenberg/ vnd Fürst zu Rügen/ an stat vnd in Namen seines Brudern des Churfürsten zu Brandenburg/ re. Vnd Wolfgang Wilhelm Pfalzgraff bey Rhein/ Herzog in Bayern/ Graffe zu Beldens vnd Spanheim/ an stat vnd von wegen S. L. Mutter/ vnserer liebe Oheim vnd Fürsten/ ihrer anmassungen halben/ in diese Fürstenthumb auff eine zwischen Ihren E. (vorberürten vnsern Kayserlichen Mandatis vnd rechtmessigen verordnungen stracks zuwider/ darneben zu nachtheil vnd versang anderer hierunter Interessirten) eingegangene nichtige verbottene vergleichung/ thätlich einzuziehen/ newerung anzustellen/ vnd sich in die Possession de facto einzudringen vnderstanden/ Damahlen nicht allein gestracks vnser Commissarius dagegen protestirt vnd contradicirt, sondern auch als bald den siebenzehenden Junij berüre vnser Mandatum inhibitorium cum citatione öffentlich publiciren vnd anschlagen lassen/ In massen wir hernacher
 als

als wir dieser angemassen Vergleichung/ vnd der darauff vorbesagten vnsern
 Kayserlichen Mandatis vnd verbotten zuwider/ vns zum despect vnd verach-
 tung vorgenommener attentaten, von vnsern abgeordneten Commissarien vnd
 anderen des Heyligen Reichs ansehenlichen Ständen berichtet/ insonderheit
 aber/ das beyde vorgemelte Fürsten angeregte Mandata zu eludiren, sub & ob-
 reptiois zubeschuldigen/ ihres gefallen außzudeuten/ zu restringirn vnd ca-
 villirn/ dadurch die Bnderthanen irrig zumachen/ vnd ihnen bezufallen vnd
 anzuhängen/ zu verleiten gelüfseten/ vnd dergestalt das commodum possessio-
 nis zu ihrem vortheil an sich zubringen/ sich anmassen/ vngeacht wir allbereit
 einem jeden so zu diesen Fürstenthumb vnd Länden zu: oder anspruch zuhaben
 vermeint/ den weg Rechts gnugsam geöffnet/ vnd dieselb zu außführung
 ihrer præntension vor vns/ als dieser sachen vnmittelbarn einzigen Richter Ei-
 tze vnd geladen/ vnd wie wir erwogen/ das dadurch vns vnd dem Heiligen
 Reich/ auch andern Interessenten so sich bey vns allbereit angegebe/ vnd die
 Sachen mit Recht versangen/ nicht allein ein grosses vnwiderbringliches præ-
 iudicium, sondern auch da demselben nicht vorkommen werden solte/ nichts ge-
 wissers/ dann das darauff den Gälischen Fürstenthumb vnd Länden euffer-
 ste gefahr vnd schaden/ wie auch den Benachbarten grosse weitleuffigkeit vnd
 vnruhe zugewarten/ Derwegen solches zu verhüten/ auß Kayserlicher macht
 vnd vollkommenheit obangeregte/ an sich selbst null vnd kraffelose vergleichung/
 Cassirt vnd außgehoben/ vnd euch vielfaltig durch vorangedeute vnd neue
 vnser Commissarien/ wie auch hernacher den siebenden Julij jüngst selbst
 schriftlich ermahnen/ vnd Allergnedigst auch ernstlich befohlen/ das ihr euch
 an diese handlung/ noch was in andere weg tentirt/ oder sürgenommen werden
 möchte/ im geringsten nicht lehren/ noch vnsern Kayserlichen befehlen ihres
 zuwider euch einlassen sollet. Hierüber damit obgedachten beyden anwesen-
 den Fürsten/ vorbesagtes wider Rechtlich vnverantwortliches beginnen/ der
 gebür nach gestewre vnd abgewehrt werde/ euch samptlichen vnd einem jeden
 insonderheit vnder dato den eufften Julij durch öffentliche Patenten vnd
 Mandata abermahlen auß Kayserlicher macht vnd vollkommenheit bey peen
 vnser vnd des Heiligen Reichs Acht vnd aber Acht/ auch verlicrung aller Le-
 hen/ Gnad/ Privilegien vnd Freyheiten/ darin die Vbertreter ipso facto ohne
 etnige fernere erkläung gefallen sein sollen/ Ernstlich vnd vestiglich befohlen
 vnd gebotten haben/ das ihr ohn vnser erlaubnuß vnd bewilligung keinem In-
 teressenten/ wer der auch seye/ für ewern Herrn vnd Obrigkeit erkennen vnd an-
 nehmen/ noch demselben etnigen beysfall thun/ huldigen/ oder in andere weg
 beypflichtig

Beypflichtig machen/ sondern biß die sachen an vnserem Kayserlichen Hoff/ da
 sie allbereit anhängig/ vnd dahin sie gehörig/ gänglich entscheiden werde/ da
 mit in ruhe stehen sollet/ Wir auch/ da diesem vnserm Kayserlichen rechtmef-
 sigen Mandat vnd gebott zugegen vnder dessen allbereit/ es sey mit einlaß/ oder
 annehmung eines oder des andern Interessenten oder ihrer Gewaltträger/ wie
 auch durch leistung einiger huldigung oder sonst in ander weg ichtes de facto
 attentirt vnd fůrgangen were/ dasselbe alles vnd jedes/ als an sich selbst nicht
 tige/ eigenthätliche vnd verbotene attentata casirt, revocirt vnd auffgehebt/
 auch alles in vorigen alten stand/ wie es auff Tödtlichen abgang vorbezagten
 nechst verstorbenen Herzogen Johan Wilhelmens gewesen/ gesetzt haben/ sol-
 che Mandata auch zu Düsseldorf/ Eleve/ Lühnen vnd andern vnderschied-
 lichen Stätten/ Schlössern/ Flecken/ Dorffschafften vnd andern obrten in
 den Gütlichen/ Elevischen vnd Bergischen Fürstenthumben/ vnd dahin ge-
 hörigen Graff/ Herrschafften vnd Landen/ damit sich niemand der vnwissen-
 heit zu entschuldigen/ durch vnsern darzu abgefertigten Herolden/ vnd andere
 von vnsern Commissarien darzu gebrauchte Executores den fünff vnd zwan-
 zigsten/ sechs vnd zwanzigsten/ acht vnd zwanzigsten/ neun vnd zwanzigsten/
 dreißigsten vnd letzten Julij/ wie auch erst/ andern vnd folgenden tags August
 der gebür verkündet/ an gewöhnlichem plaz öffentlich angeschlagen vnd affi-
 girt/ solche vnser Mandata von vnserm hochansehnlichen fürnehmsten Com-
 missario/ als dem Hochwürdigem/ Durchleuchtigen/ Hochgebornen Leopolden
 Erzhertzogen zu Osterreich/ Bischoffen zu Straßburg vnd Passaw/ Her-
 zogen zu Burgund/ Graffen zu Tyroll/ vnserm freundlichen lieben Bettern/
 Sohn vnd Fürsten/ widerumb vnder dato den acht vnd zwanzigsten Julij pu-
 blicirt worden/ So heiten wir vns Allergnedigst versehen/ ihr würdet ewer
 schuldigkeit vnd der Räte erklärung nach/ solchen vnsern ernstten so hoch ver-
 peenten befeichen vnd gebotten/ schuldigen vnd vollen gehorsam geleistet/
 vnd zu keinem andern widrigen/ durch frembde vngereimbre einbildungen oder
 andere vnartige affecten verfahren vnd bewegen/ noch abwendig lassen machen.
 Weil vns aber nicht allein von vnsern abgeordneten hochansehnlichen Com-
 missarijs/ sondern auch andern fürnehmen Ständen des Heyligen Reichs be-
 glaubter bericht/ wie dann solches notorium vnd Landkündig/ auch facti per-
 manentis ist/ zikommen/ das ihr obangeregten vnsern rechtmessigen Mandat
 ris vnd vielfältigen erinnerungen vngerecht vnd zuwider/ ewer sampt vnd be-
 sondern ein gut/ da nicht mehrer theil/ obbesagte beyde Fürsten im Namen ihrer
 Principalen/ ohne vnser erlaubnuß vnd beleyhung für ewere Herrn erkends

vnd angenommen/ derselben sich mit handglübben vnd andern einlaß beyge-
 pflichtet/ theils denselben gehuldiget/ deren gebott vnd verbott gewertig vnd ge-
 horsam seyd/ von ihnen zu Räten/ Beampten/ Dienern vnd andern Befelchs-
 habern euch bestellen/ die Gerichte in Ihrer E. Namen besigen/ begleiten/ auch
 zu einnam/ verwahrung vnd besatzung der Schlöffer vnd Städte gebrauchen
 lassen/ hingegen aber wider vnser abgeordnete Hochansehnliche Commissa-
 rien allen vnghorsam erzeigt/ dieselben von den Städten vnd Schlöffern/ als
 wann ihr vns als Römischen Kayser vnd Obristen Herrn keinen gehorsam
 mehr schuldig/ wir auch euch vnd beyden anwesenden Fürsten nicht zugebie-
 ten/ noch ich etwas in diesen Landen zuthun hetten/ abgewiesen/ die Pforten
 versperret/ ja auch öffentlich verlauten lassen dürffen/ ihr hettet ewere angebor-
 ne Herrn im Land/ vnsern Ehrenhold zuveracht: vnd verlesung vnser vnd des
 Reichs Hochheit/ in vielen Städten nicht einlassen/ noch vnser Mandata
 annehmen/ oder ihme die anzuschlagen/ verstaten wollen/ sondern demselben
 in verrichtung seines ihme von vns anbefohlenen Amptis verhindert/ viel
 schimpffs vnd spots erwiesen/ vnd dergleichen vnzehliche attentata fürgenom-
 men/ vnd noch dabey beharren/ vnd täglich mehr vnd mehr wider vnser verbott
 fürnehmen sollet/ Also das es sich ansehen läffet/ das ihr euch des schuldigen ge-
 horsams ganz wienziehen/ vnd euch selbst ewers gefallens Herrn nemen vnd
 ansagen/ vnd vns in vnser Kayserlich Ampt vnd Obrigkeit eingreifen wollet/
 dardurch ihr in vorangeregte vnser Mandata einverleibte straffen ipso facto
 gefallen. Wie wol wir nun gnugsam befügt waren/ wegen solches vnverant-
 wortlichen beharlichen vnghorsams vnd contumaciae, auch vns vnd den vnse-
 rigen hierin erwiesenen grossen respects vnd veracht/ zu erhaltung vnser als
 Regierenden Röm. Kayseris reputation/ autoritet vnd hochheit/ wider alle
 vnd jede Vbertreter stracks simpliciter ohne andern weitem auffenthalt/ oder
 Citation mit der Declaration der Acht vnd aber Acht fortzufahren/ vnd deren
 Execution jedermenniglichen zuerlauben. Gleichwol damit niemand einige
 vberteilung zuklagen/ auch jedweder spüren möge/ das wir keinem vnrecht vnd
 zu kurz thun wollen/ sonder jedweder desto mehr seines frevelmüthigen vnghor-
 sams vnd auffgesslicher verbrochung/ auch daher wolverdienten straff zubere-
 wen/ vnd davon abzustehen vrsach vnd gelegenheit finden vnd bekommen möge.
 So haben wir dieses vnser Kayserlich lezt vnd endlich Mandatum/ noch zum
 vberfluß/ vnd allein auß Kayserlichen Gnaden außgeben/ vnd damit dasselb
 nicht auch gleich allen den vorigen/ mit vorgebildem grossen vngrund vnd al-
 ter vnwarheit

Ir vnwarheit pro sub & obreptio gehalten/durch vnserer freundslichen geliebten
 Bettern/ Sohn vnd Fürsten Erzhertzogen Leopold/ Als desfalls verordneten
 Hochansehnlichen sarnchinsten Commissari & sampt dero zugeordneten (sie
 verrichten es gleich selbst in der Person/ oder welchen S. I. oder dieselb dazzu
 verordnen möchten) allenthalben in berürten Fürstenthumben vnd Landen
 publiciren vnd anschlagen lassen wollen. Befehlen euch darauß samptlich/
 vnd einem jeden insonderheit auß Kayserlicher macht vnd vollkommenheit/
 nochmahln bey peen vnser vnd des Heyligen Reichs Acht vnd aber Acht/ auch
 andern straffen vorigen Mandatis einverleibt/ dazzu bey verlust aller ewer Eh-
 ren/ Digniteten vnd Würden/ ernstlich vnd vestiglich gebietend/ vnd wollen/
 das ihr innerhalb sechs wochen den nechsten nach verkündigung dieses (die
 wir euch für den ersten/ andern vnd letzten Termin peremptoria zu allem vber-
 fuß ansehen) allen vnsern vnd vnserer Commissarien vorangeregten Mandat-
 tis alles ihres inhalts ein völlig gehorsam genügen thut/ alles das jenige/ was
 ewer eiter oder der ander/ oder auch alle in gemein dagegen gethan/ verhandlet/
 eingegangen oder den Fürsten mit handgelübden/ eyd/ huldigung/ beypflich-
 tung/ einlaß/ oder in andern wegen zugesagt haben möchte/ abschafft/ cassire
 vnd widerruffet/ euch wider in ewere vorige disfalls in Anno fünfzehnhundert
 neunzig sechs außgerichte/ vnd volgendts nach absterben vielgedachten Herzo-
 gen Johann Wilhelms am neunden Aprilis zu Düsseldorf erneuerte vnd be-
 theuerte Union begehret/ vnd als Regierenden Römischen Kayser für ewerer
 Ober/ vnd Lehenherm/ auch vndisputirlichen vnd einzigen Richter dieser sa-
 chen erkennet/ beyder vielbesagter Fürsten keinen/ oder wer sich sonst von den
 Interessenten vor entscheidung dieser/ vor vnserm Kayserlichen Hoff Rechte-
 hengigen sachen anmelden würdet/ zu keiner Possession gestattet oder zulasset/
 deren gebort oder verbott nicht eins oder andern gewertig seyret/ sondern euch
 gang vnd zumahl Neutral halter/ vnd alles im alten stand/ wie es auß absterben
 mehrermelten Herzogen gelassen/ wider stellet vnd handhabet/ vnd endlich vn-
 sers Reichlichen außschlags vnd verordnung gewartet / dis vnd kein anders
 thut/ als lieb euch ist vorherürte straff zu vermeiden/ wie wir auch die dagegen
 vorgenommene newerungen als verbotten/ vnd an sich selbst nichtige attentata
 hiemit nachmals cassiren/ auffheben/ vnd alles in vorigen stand setzen/ auch euch
 allesampt vnd einen jeden insonderheit der handgelübden/ eyden/ pflichten/
 huldigungen vnd dergleichen/ so von einem oder andern mehr besageten/ bey-
 den Fürsten beschehen oder abgenommen sein möchten/ auß Kayserlicher
 R 2 macht

macht vnd vollkommener gewalt abzuwehren vnd erledigen/ Dergestalt das die selbige dardurch im geringsten nicht gebunden noch gefahrt sein sollen/ Welche nun auff dieses vnser Mandat/ sich wider zu vnserm gehorsam vndergeben/ demselben volg leisten/ vnd von voriger contumacia vnd widerseztigkeit ablassen vnd resipisciren/ derhalben bey Hochgedachten vnsern hochansehnlichen fürnehmsten Commissario vnserer freundlichen geliebten Vetteren vñ Sohns/ Erzhertzogen Leopoldi I. sich angeben vnd erklären werden/ denselben thun wir auß Kayserlichen milden gnaden diese ihre vorige vbertretung/ verbrechen/ vnd dahero verwirckte straffen Allergnedigst nachgeben vnd verzeihen/ Nemen sie auch hinfüro in vnsern vnd des Heiligen Reichs schutz vñnd schirm auff/ wollen immittels zubefürdern nicht vnderlassen/ das in diesen Fürstenthumb vnd Landen/ ein gewisser Fürst der darzu befugt ehsts möglich benennet vnd vorgesetzet werde/ Die andere aber/ so in ihrem vorgenommenen vnterantwortlichen vngehorsam vnd vorseglichen freuel beharren/ vnd innerhalb berührter zeit nicht resipisciren oder als bald sich nicht erklären/ dieselbe wollen wir endlich hiemit in vnserer vnd des Heiligen Reichs Achte vnd aber Achte/ auch andere den Mandatis einverleibte straffen jetzt als dan/ vnd dan als jetzt erklärt/ denunciirt vnd öffentlich verkündet haben/ Wie wir sie dann darinn nochmals auff solchen fall erklären/ denunciiren vnd öffentlich verkünden/ auch nach verlauff des angezeigten Termins/ ohne einigen vnterschied alle ihr Leib Haab vnd Gut jedermenniglichen erlauben/ Darnach ihr euch sampt vnd ein jeder insonderheit zurechten vnd zu hüten/ Vnd dis ist vnserer endliche ernste meynung vnd befehl/ Geben auff vnserm Königlichem Schloß zu Prag den sechsten tag des Monats Novembris/ Anno rc. Sechszehen hundert vnd Neundren/ Vnserer Reiche des Römischen im fünff vnd dreißigsten/ des Hungarischen im achte vnd dreißigsten/ vnd des Böheimischen auch im fünff vnd dreißigsten.

Rudolff.

U. von Stralendorff.

Ad Mandatum Sacrae Caesaris
Majestatis propriam.

God: Hertel.

Wartin

Warinn Hochgedachte Gewalthabende Fürsten/ sich/ Ihrer FF. GG. Heren Principalen Vnderthanen/ Beampre/ vnd zu ihrer Defension geworbenes Kriegsvolck zum euffersten graviret vñ beschwert befinden/ Vnd wofern demselbē durch dienliche zugelassene Rechtsmittel nicht begegnet würde/ noch ferner beschweret zuwerden billich fürchten: Auß vrsachen weil vber vielfältige anzügliche aufflagen/ deren sothane Mandata vnd Evtential Bannimenta vol sein/ darinn

Erstlich ein vnerhöretter Seneeng begriffen/ so ohne einige vorhergehende erkandnuß vnd ungehört der Partheyen notturfft ergangen/ Vnd aber die Rechte vnzweifflich vermögen/ quod quilibet pro suo iure sufficienter sit audiendus; & quod sententia causæ cognitione omissa, & parte altera non audita, ipso iure sit nulla.

Fürs ander/ weil Ihre FF. GG. vnd dero Chur- vnd Fürstliche Principalen/ nicht allein ihrer wolerlangten rechtmässigen Possession/ sondern auch dero ganzen zustehenden Rechtsens darinn benommen vnd entsetzet werden. Vngeachtet die Rechte nicht allein dergleichen spolia verbieten/ sondern auch da dieselbe de facto ergehen/ dem spoliato allerhand behülffliche remedia darwider verordnen/ deren er sich zugebrauchen/ vnd vermittels welcher er antomnia muß restituiret werden.

Fürs dritte/ weil auch Ihren FF. GG. vnd dero Principalen darinn abgeschnitten vnd verweigert wird/ was sonsten dem allgeringsten Vnderthanen im Reich vergönnet vnd zugelassen/ Nemblich die erledigten Erbschafften/ vnersucht der Obrigkeit oder Richters einzunehmen vnd zubesigen/ Warauß/ wann solches also ergehen solte/ ein zumahl grosser absurdum erfolgen würde.

Fürs vierdte/ weil es auch wider die verschiedene vielfältige ausdrückliche Kayserliche concelsiones vnd confirmaciones laufft/ die da nicht allein dergleichen apprehensionem possessionis auff dem fall den darinn benanderten Erben zulassen/ sondern auch bey hoher peen die Stände vnd Vnderthanen dahin/ vnd zugenembhaltung derselben verweisen vnd gebieten/ Atque Imperatori vnus debet esse calamus & vna lingua, & constans ac perpetua debet eius esse voluntas, tanquam in fonte iustitiæ: Convenit enim Principibus verbum illud: Semel locutus est Deus: & quod scripsi scripsi.

Fürs fünffte/ weil es auch der Kayserlichen Capitulation/ des Heyligen Römischen Reichs Constitutionibus, vnd dero Executions Ordnung/ ja

28
auch dem Fürstlichen herkommen vnd gewonheiten/ die da wollen/ das ein reg-
licher Fürst im Reich in guter bereitschafft sitzen/ vnd in seinen Landen solche
embtliche fürsichung thun solle/ damit sie vor allem feindlichen vberfall vnd ein-
griff gesichert/ vnd der benachbarten Kriegshülff desto besser vnd süßlicher ge-
messen können/ entgegen ist. *Atque nihil magis Maiestati regnantis conueniens
est, quam legem quam semel tulit tutari. Et consuetudines praesertim familiarum
illustrium pro lege habeantur, à qua ipsis nolentibus non recedendum.*

Fürs sechste/ weil es auch Ihr F. G. mehrmahln gerhaner oblation
de prestanda sufficienti cautione. dahin Ihr F. G. sich auch nochmals auff
treffligst anerbieren/ schnur stracks entgegen laufft/ da doch die Rechte auch
sagen vnd wollen/ quod vadari paratus nullo modo gravari debeat. Zu geschwe-
gen entlich/ das in sohanen vermeinten Mandatis vnd Achts erklärungen/
weder der Prætidirenden vnd Supplicanten Nam/ noch die vrsachen des
Kaysertlichen vorhabens/ noch der Kläger intention vnd vorbringen exprimi-
ret oder zubefinden/ welche defectus an ihme selber sothane Mandata verdeck-
tig/ null vnd nichtig machen/ vnd in das ansehen setzen/ als wann sie à Iudice
non implorato wider der Rechte heilsame verordnung erteilet vndd fürge-
bracht weren.

Hierumb so wollen mehr hochgedachte Ihre F. G. vor sich/ ihre Prin-
cipalen/ Beampte/ Stände/ Vnderthanen vnd angehörtiges geworbene
Kriegsvolck/ wegen sohaner vber die maß grossen vnd vnbillichen beschwerun-
gen/ vnd in specie wegen deren sub & obreptitiè vbel außgebrachten Mandat-
ten vnd Processen/ so wie oben außgeführt in iure & facto vnbestendig/ vnd
auff lauter solche præsubposita gegründet/ sampt vnd sonders omni meliore
modo, salua notoria nullitate, wie es zu Recht am besten vnd sömlichst gen
schehen soll/ kan oder mag/ sich beruffen/ vnd von der Römischen Kayserlichen
Majestät vnd dero Commissario/ hinwiderumb an dieselbe/ seu à Cæsare male
informato ad melius informandum & Committentem, vnd das ganze Heilige
Römische Reich/ Chur/ Fürsten vnd Stände/ oder wo sonst diese sache ihrer
are vnd etgeschafft nach hingehört/ mit vorbehalt aller Rechtlichen beschre-
benen vnd eingeführten wolthaten/ Insonderheit der wolthat l. per hanc C. de
temp. & rep. appell. seu consul. supplicite vnd appellirt haben/ Vnderwerffen
darauff denselben sich/ ihre Röhre/ Dienere/ Kriegsvolck/ Beampte/ Vnder-
thanen/ Schutzverwandten/ vnd in summa diese ganze sache/ vnd was darzu
gehören oder zugezogen werden mag/ Der respectivè vnderthänigsten/ freund-
lichen

lichen vnd gnedigen zuversicht/ Sie darbey gegen vnrechtmeßigen gewalt vnd
vbercülung schutz/ schirm vnd vertretung wol finden vnd haben werden. In
massen Ihre H. H. sich dann zu Rechtlicher prosequirung dieser respectiv
Supplication vnd Appellation/ vnd ferner anzeigung vnd außführung ihres
grauaminum htemit anerbotten haben wollen.

Vnd gesinnen darauff an euch Ern Notari Instanter instantius & instanti-
sime, diese Appellation fleißig ad notam zunehmen/ Ihren H. H. Apo-
stolos Testimonialia darüber mitzuehellen/ vnd vmb die gebür ein oder mehr
Instrumenta zubegreifen/ dieselbe auff Pergament zu ingrossiren/ vnd her-
nacher an gebürenden ohrten zu insinuiren/ vnd in Summa alles darbey zu
berichten/ was deßfals ewers Ampts ist/ vnd euch zuverrichten zuschreibet/ da-
mit Ihre H. H. deren der notturfft nach/ sich zugebrauchen haben mögen.

Dieweil nun auff all solche gnedige requisition wir Notarien vnser trö-
genden Ampts starck erinnert/ So haben wir nach empfahung obangeregten
inscribireten Appellation zettels gegenwertig Instrumentum loco Apostolorum
Testimonialium, so viel solches eyds halben vnd zurecht/ Salua tamen Imperato-
ria Maiestate & sine vlla eius læsione sich gebürt/ vnd ferner nicht davon prote-
stirent/darüber verfertigt/mitgetheilt. Geschehen im Jahr/ Indiction/ Kay-
serthumb/ Monat/ Tag/ Stund vnd Wahlplatz als obstehet/ In beysein vnd
anhören der Ehrnhafft vnd Wolserfarnen Johannem Sonntag vnd Jacobem
von Blodorff als beyden hierzu sonderlich beruffenen glaubhafften gezeugen.

Vnd nach dem ich Peter Gans Ratingensis auß Röm. Kayf. Mayestät
ein offner Eretriter/vnd an deroselben Kayserlichen Camergericht zu Speyr
Immatriculirter Notarius, als obangeregte Appellation/ vermittelts besche-
hener narration, verlesung vnd vberreichung des zettels vnd arrh, vorge-
schriebener massen interponirt/ sampt dem auch nachbeschriebenem Nota-
rio Adamo ab Hagen, vnd ernenten gezeugen Persönlich gegenwertig gewe-
sen/ Dasselb also beschehen zusein/ gesehen vnd angehört/ So haben wir
beyde Notarien/mit vorbehalt gethaner Protestation/ darüber diß Instru-
mentum auffgericht/ dasselb auch ich auff diß Pergament ingrossirt/ vnd
für mein Person mit Christlichem Tausß vnd Beynamen/ wie in gleichem
gewöhnlichen Notariat zeichen respectiv vnderschieden vnd verzeichnet.
Alles zu vrkund der Warheit/ darzu neben ermeltem mit Notario insonder-
heit gebürlich requirirt vnd erfordert.

Petrus Gans Notarius

Als ich Adam Hagen von Pabst vnd Kayserlichen authoritet gemach-
 ter vnd zu Speyr angelassener Notarius/ bey diesem actu Appellationis mit
 dem vorgemelten Notario vnd zeugen gegenwertig gewesen/ vnd derselb also
 ergangen/ Derwegen ich dis Instrumentum/ mit sonderm ernst darzu re-
 quirire vnd erfordert/ neben vorgemeltem Notario/ in fidem auch vnder-
 schreibe/ vnd mein Notariat zeichen dabey setze/ Jedoch dergestalt/ das hie-
 mit im geringsten der Kayserlichen Mayestät/ vnd meinem Notariat enb
 nicht zuwider/ vnd ferner nichts gethan haben wolle/ davon ich hie mit ein
 vnd aber eins offentlich protestire.

Hagen Notarius.

